

關中金石文字存逸考

關中金石文字存逸攷卷二

揚州甘泉毛鳳枝撰

西安府下

唐

大德禪師遷葬記

沙門義宣撰行書
乾元二年二月

逸

全文未見

金石文字記云在西安府華嚴寺案此石今久
逸矣 咸甯縣志云華嚴寺在樊川北隈有會
聖院真如塔樊川在西安府城南二十里韋曲
鎮之南

邠州蟠川府長史焦摧墓誌銘

正書

寶應元年十二月存

全文見古誌石華續編

誌畧云公諱璿字潤河內廣平人也曾祖仁皇

職口陪戎校尉祖貞皇勳官上護軍父疋君以

寶應元年十二月十二日遭疾卒於私家春秋

二十以唐寶應元年歲次壬寅十二月景午朔

廿七日庚辛殯於邠州三水縣歸義鄉邠邑原

此石今藏渭南趙乾生詹事

元中

家新唐書地

理志邠州有府十其六曰蟠川今三水縣有北

周賀屯植墓誌云葬於幽州三水縣捧川之良

平原棒川卽蟬川也方輿紀要云半川府在陝西邠州三水縣北十五里案半川亦卽蟬川皆

一音之轉也又誌云十二月景午朔廿七日庚

辛以逐日建辰推之則丙午

唐人諱丙字故稱景午景午卽丙午

也

朔之廿七日當作壬申此誌作庚辛選擇家

以酉初爲庚時戌初爲辛時庚辛二字或紀葬時亦未可知不得其詳姑從闕如 新唐書百

官志諸衛折衝都尉府每府長史各一人上府正七品下中府從七品上下府從七品下武散階四十有五從九品上曰陪戎校尉司勳郎中

掌官吏勳級十轉爲上護軍視正三品 誌云
璿爲河內廣平人攷新唐書地理志懷州河內
郡無廣平縣洺州稱廣平郡亦無廣平縣惟方
輿紀要云唐置廣平縣在今直隸廣平府廣平
縣之馮鄭堡亦未言唐縣屬何郡姑存其說以
俟攷云

贈太保祁國貞公郭敬之家廟碑

顏真卿撰并正書
廣德二年十一月

存

碑陰郭氏子孫題名

正書

存

全文及題名均見金石萃編

今在西安府城內布政司署中虛舟題跋云舊
史書太保追封祁國公此碑不書恐是史誤案
此碑係代宗御題隸書碑額云大唐贈太保祁
國貞公廟碑是敬之在當時非特贈爵且贈諡
矣虛舟未見碑額也 新唐書百官志太師太
傅太保各一人是爲三師皆正一品

與郭僕射書

顏真卿撰并行書
無年月王虛舟云當在廣德二年十一

月

存

全文見金石萃編

今在西安府學碑林有重模本郭僕射者郭英

又也附見新唐書郭知運傳中 漢書王子侯
表葛魁侯戚坐傳家吏恐獨受賊師古曰獨謂
威力脅人也音呼葛反錢竹汀先生三史拾遺
史記蘇秦傳衡人日夜務以秦權恐惕諸侯惕
或作喝下文虛疑恟喝索隱曰本亦作獨竹汀
先生曰恐獨猶今人言恐嚇案此帖再獨入座
尙書欲令便向下座此獨字卽本史記王子侯
表

左武衛將軍白道生碑

于益撰摯宗行書
永泰元年三月

存

全文見金石萃編

今在西安府 文廟中碑右方題銜下題字
云關中金石記載碑在咸甯鳳栖原不知何時
移至府學仰臥於地錫山周君行訪得之以告
愛其書類北海因爲重立道光二年重九日陶
山唐仲冕題同觀者上元車持謙秋船吳縣蔡
成輅曼受長沙黃本驥虎癡及姪釗敬之又碑
之中空處題字云書碑之擊宗濮陽人見鄠縣
吏部南曹石幢虎癡記曼受書案陶山先生官
陝右時最喜表章古蹟黃君虎癡與先生同郡
遠於金石之學所著古誌石華隋唐石刻拾遺

於秦中碑碣攷訂極詳茲觀其瞻謁費宮訪碑
廊廡賓主題名雍容爾雅想見一時文物之盛
也

李氏三墳記

李季卿撰李陽冰篆書
大曆二年

存

李氏栖先塋記

李季卿撰李陽冰篆書
大曆二年

存

碑側獨孤密題字

正書

存

全文見金石萃編

今在西安府學碑林陽冰篆書其二碑原刻刻
缺此係宋大中祥符三年九月重刻者惟先塋
記碑側有口州防禦使獨孤密題字正書二行

猶唐刻也。摺字卽古文遷字。見許汝長說文。禿部。遷字篆下。獨孤密爲韋皋幕僚。見通鑑。唐紀。憲宗元和元年。柳柳州文集有送邠甯獨孤書記。起辟命序。稱爲河南獨孤密。卽其人也。案

陽冰篆書此二記及庾賁德政頌

山東甯陽

城隍廟

記

浙江縉雲

皆經後人重刻。雖具規模。殊乏神采。惟

湖北武昌縣江中島嶼間所刻怡亭銘序字。雖無多的。係真迹。神采煥發。固不亞斯翁也。又有五臺山清涼寺碑。亦係真迹。曩常於平湖孫桂珊少尉

三錫

齋中見之

又安徽滁州有陽冰所書庶子泉銘歐陽文忠
公石篆詩序云滁州之西南有琅琊山唐李幼
卿庶子泉銘某在館閣時方國家詔天下求古
碑石之文集於閣下因得見李陽冰篆庶子泉
銘學篆者云陽冰之迹多矣無如此銘者常欲
求其本而不可得於今十年矣及此來已獲焉
而銘石之側又陽冰別篆十餘字尤奇於銘文
世罕傳焉山僧惠覺指以示余余徘徊其下久
之不能去王元之氏再傳陽冰篆詩云泠泠庶
子泉落落陽冰筆雲氣勢奔垂龍蛇互蟠屈嶧

山既剝滅石鼓又缺失惟茲數十字適勁倚雲窟模印徧華夷流傳耀緗帙書誠一藝爾小道

詎可忽乃知士人事千古名不沒蘇子美氏舜欽

和永叔琅琊山庶子泉陽冰石篆詩云周鼓秦

山壤已久下至唐室始有人人間所存十數處

豐疎異體世其珍其中琅琊石泉記比之他法

殊不倫鐵鎖關連玉鉤壯曲處力可挂萬鈞復

疑蛟虬植爪角隱入翠壁蟠未伸如三公所云

則其篆法之妙可知矣山陰楊耕夫氏賓大瓢

偶筆云李陽冰庶子泉銘在滁州某寺後石壁

上余向見舊拓本於書賈之手以其索價甚昂不能得今案耕夫爲康熙時人是此碑拓本尙傳於世也原石未知存否俟訪之方輿紀要云

琅琊山在滁州南十里滁州今直隸安徽省焉

金石萃編云記爲李季卿所述季卿在大曆中宣慰江南見新唐書陸羽傳而未詳其先世所

謂先侍郎者不知何名

鳳枝

案新唐書文藝傳

云李適字子至京兆萬年人舉進士再調猗氏尉武后時預修三教珠英書成遷戶部員外郎兼修書學士睿宗時遷工部侍郎卒年四十九

嘗夢與人談大衍數寤而曰吾壽盡於此敕其子曰霸陵西視京師吾樂之可營墓樹千松焉云云子季卿亦能文學明經博學宏詞歷官吏部侍郎河南江淮宣慰使大厯中終右散騎常侍以碑證之柩先塋記云先侍郎卽世建塋霸陵遺令也卽傳中敕其子營墓霸陵事也然則記中所謂先侍郎卽李適矣新唐書藝文志李適有集十卷舊唐書文苑傳亦載李適事不如新書本傳之詳又參舊唐書謂季卿爲宰相李適之子蓋以姓名相似而譌而之字介乎

虛實之間故尤易譎也錢竹汀先生廿二史攷

異載有此說并云宰相李適之之子名霽不名

季卿舊唐書誤矣李適之係宗室舊唐書云適之天寶元年爲左丞相五載

罷賦詩云避賢初罷相樂聖且銜杯爲問門前客今朝幾箇來杜少陵詩所謂左相日興費萬

錢飲如長鯨吸百川銜杯樂聖稱避賢卽其人矣今旣攷之新唐書李

適本傳又證以石刻錢先生之說益爲信而有

徵矣 又新唐書本傳云適著有九經要句又

云季卿在朝薦進才髦與人交有終始恢博君

子也其父子文章行事概可見矣唐詩紀中載

有李適詩 金石萃編云碑云先大夫徐公未

詳何謂案舊唐書文苑李適傳云適贈司馬承
禎詩序朝士屬和凡三百餘人徐彥伯編而序
之謂之白雲記徐公卽徐彥伯也

太中大夫太常寺丞兼江陵倉曹張銳墓誌銘

錢庭
篠撰

父張怡正書姊夫李西華題誌
大厯九年三月

存

全文見古誌石華續編

誌畧云公諱銳字郊侯姓張氏清河人也曾祖
志鄜州洛交縣令祖彥昇贈鄧州長史父怡朝
議大夫虢州長史公虢州之長子也生則秀異
幼而聰敏未弱冠入仕以門蔭解褐授右司禦

率府兵曹至德中充四鎮節度隨軍判官知支
度事轉恒王府掾加朝散大夫轉光祿丞屬西
蕃未靖國步猶虞尋奉使宣傳 聖旨陷沒

賊庭者久之公辯說縱橫灌謀應變陳之以禍
福懼之以威嚴既迴有 詔特遷太中大夫蜀

王府司馬公以恭承 睿畧遠仗 天威於我

何功固辭不拜前後三表方允乃授今任焉由
是 恩制授太夫人長樂縣君以板輿迎侍於
江陵且夫奉使不屈忠也揚名立身孝也方期
積慶用以成家天道何常降年不永以寶應二

年正月廿五日天沒於江陵官舍春秋廿有七
以今大厯九年歲次甲寅三月四日癸卯寔於
京兆之鳳栖原從太君之新塋也

此石今藏渭南趙乾生詹事

元中

家觀誌所云

銳於當時傳旨西蕃奉使不屈亦忠節之士也
惜史傳未載賴此誌以傳其人耳

新唐書百

官志文散階正五品下曰朝議大夫東宮官屬
左右司禦率府兵曹參軍事一人從八品下節
度使兼支度營田則有副使判官各一人銳充
四鎮節度隨軍判官四鎮安西四鎮也方輿紀

要云唐安西都護府屬隴右道統龜茲

今新疆庫車地

庫車龜茲音相近焉

焉耆

今新疆喀什沙爾地

于闐

今新疆和闐地

疏勒

今

疆喀什噶爾地

四鎮時又於邊境置節度經畧使安西

節度使治安西都護府

安西都護府治龜茲城卽庫車

開元六

年置四鎮節度使十二年改曰磧西二十九年

又改曰安西至德初改曰鎮西大曆三年仍曰

安西亦曰安西四鎮節度使通典云安西節度

使統龜茲四鎮蓋四鎮之地悉屬焉又百官志

云王府官掾一人正六品上光祿寺丞二人從

六品上

鏡由王府掾轉光祿丞以正六品上改從六品上者蓋中朝之官尊於王府之

官春秋之義王人雖微必加於諸侯之上卽是道也王府司馬一人從四

品下司封郎中所掌文武官五品母妻爲縣君

銳官江陵倉曹係正七品下而職爲太常寺丞

則從五品下故其母得封縣君也誌云銳爲恒

王府掾恒王名瑱元宗子好方士常服道士服

見新唐書十一宗諸子傳又云遷蜀王府司馬蜀王名遯本

名遂代宗子亦見十一宗諸子傳惟傳云蜀王於大曆十

四年始就封而銳卒於寶應二年葬於大曆九

年其時蜀王尙未就封安得爲其府司馬乎豈

史誤歟抑誌誤歟姑存其說以俟攷云

贈太子少保薛王友顏惟貞家廟碑

子真卿撰并正書建中元年

七月

存

顏家廟碑額齋堂記

顏真卿正書家相按此條依目錄更定分爲二種

存

全文見金石萃編

今在西安府學碑林四面皆刻字碑陰額上刻

齋堂記字畧小碑有題字數行宋太平興國七

年八月南岳夢英大師篆書紀都院孔目官李

延襲移碑事 新唐書百官志東宮官屬太子

少保一人從二品王府官友一人從五品下掌

侍游處規諷道義侍讀無定員薛王名業睿宗

子元宗弟後諡惠宣太子性好學嘗官祕書監

見新唐書三宗諸子傳

屬校

案有唐一代書法

魯公集其大成所傳碑碣亦夥惟顏家廟碑近於推腫反覆觀之不能得其妙處蓄疑已久後閱曾文正公家書云嘗見舊拓顏家廟碑圭角峭厲轉折分明絕類歐書不似近日通行本之癡肥也吾疑頓釋矣

不空和尚碑

贛鄂撫徐浩正書
建中二年十一月

存

全文見金石萃編

今在西安府學碑林碑側題字一行云大中八

年四月十五日再立疑武宗毀佛寺時此碑已
什於地至宣宗時弛浮屠之禁此碑始重立也

涇王妃韋氏墓誌銘

張周撰正書
建中三年二月

未詳所在

全文見古誌石華

此誌未書葬地但云建中二年十二月己酉薨
於寢以三年二月庚申葬於原曾見一拓本其
紙墨的係秦拓故屬之西安府焉涇王名侔肅
宗第七子見新唐書十一宗諸子傳 此誌題
銜云給事郎行河南府洛陽縣丞翰林學士賜
緋魚袋張周撰攷新唐書百官志文散階正八

品上曰給事郎京縣縣丞二人從七品上畿縣
縣丞一人正八品下地理志云洛陽赤縣也縣
丞品級當與畿縣品級相同亦係八品張局以
八品微秩且係縣佐得充翰林學士蓋唐時官
制翰林之職無論官職大小皆得與選蓋祇重
文學而不論資格也百官志總序云學士之職
本以文學言語被顧問出入侍從因得參謀議
納諫諍其禮尤寵而翰林院者待詔之所也唐
制乘輿所在必有文詞經學之士下至卜醫伎
術之流皆直於別院以備宴見而文書詔令則

中書舍人

百官志中書省舍人六人正五品上

掌之自太宗時名

儒學士時時召以草制然猶未有名號乾封以後始號北門學士元宗初置翰林待詔以張說陸堅張九齡等爲之掌四方表疏批答應和文章旣而又以中書務勅文書多壅滯乃選文學之士號翰林供奉與集賢院學士分掌制誥書敕開元二十六年又改翰林供奉爲學士別置學士院專掌內命凡拜免將相號令征伐皆用白麻其後選用益重而禮遇益親至號爲內相又以爲天子私人凡充其職者無定員自諸曹

尚書

百官志六部尚書皆正三品

下至校書

百官志秘書省校書郎二人正

九品

皆得與選入院一歲則遷知制誥未知制

誥者不作文書班次各以其官內宴則居宰相之下一品之上憲宗時又置學士承旨唐之學士宏文集賢分隸中書門下省而翰林學士獨無所屬故附列於此云余因攷定張周官職備錄其說如右以見古今官制名同實異更以見唐時翰林人材輩出蓋亦不拘資格之效也

絳州聞喜縣令楊君夫人裴氏墓誌銘

李衡述正書貞元元年十一月

未詳所在

全文見古誌石華續編

誌畧云貞元元年仲冬十一月十有七日夫人
葬於京兆之九畎原曾祖友直皇朝給事中祖
伯義皇朝彭州刺史考諱就皇朝大理評事夫
人卽評事府君次女也及笄而嫁楊君君宏農
人也

此石本出西安今未詳所在矣誌云夫人伯姊
嫁於吳氏大厯之中爲國元舅攷新唐書后妃
傳代宗之母爲章敬皇后誌中所謂吳君卽后
弟吳濠也又云建中歲大盜移國卽指朱泚僭

號之事又誌題銜云度支郎中隴西李衡述衡
爲李翔叔父後官戶部侍郎見韓昌黎所撰李
楚金墓誌中又咸甯長安二志無九毗原之名
得此可補其闕焉 新唐書百官志大理寺大
理評事八人從八品下戶部所屬度支郎中一
人正五品上戶部侍郎二人正四品下

華州下邽縣丞韋端妻王氏墓誌銘

子纘撰并正書
貞元六年二月

存

全文見古誌石華誌云遷殯萬年縣加川鄉西

原

今在西安府學碑林韋端尙有墓誌與此誌攷

據均詳見後

東陵聖母帖

懷素草書
貞元九年

宋元祐三年戊辰重刻存

釋文見金石萃編補遺

今在西安府學碑林湖南零陵縣綠天菴瑞石

帖中亦刻此帖 案後漢書劉昭補注郡國志

云廣陵郡廣陵縣有東陵亭博物記曰女子杜

姜左道通神縣以爲妖閉獄桎梏卒變形莫知

所極以狀上聞因以其處爲廟祠號曰東陵聖

母此帖所紀卽其事矣又關中金石記云此帖

書於德宗時文稱皇從叔父淮南節度觀察使
禮部尙書太原郡公而不書名蓋指建立祠宇
之人

鳳枝

案拓本云時因碩德從叔父淮南節

度觀察使禮部尙書監軍使太原郭公道冠方
隅勳崇南服云云從字上無皇字畢氏旣增一
皇字復將郭字誤作郡字因以其叔父與監軍
使合爲一人蓋以大草龍蛇未能諦視故也此
帖字迹難識釋文亦不多見光緒四年武威劉
夢惺大令

開第

遊宦關中與予善素喜顛素草

書嘗爲此帖釋文出以示余余復爲校定數字

始可成誦云

此帖當係宋人以墨迹模刻者後有左拾遺裴
休試大理評事柳乘鄉貢進士柳槃大和四年
十月十二日同登題名正書五行左行 石墨
鐫華云此帖輕逸圓轉幾貫王氏之壘而拔其
赤幟矣亦元祐年刻手極佳與藏真律公均不
失素師筆意

藏真律公二帖

懷素草書
宋元祐八年刻

存

全文見金石萃編補遺

今在西安府學碑林雍州金石記云藏真一則

律公二則宋游師雄刻石石墨鐫華云藏真律
公共三帖宋游師雄刻之於石者所謂師游絲
筆法也有驚蛇飛電之悅渺有挽強拔山之氣
力最奇筆也

千字文

懷素草書
明成化六年歲在庚寅重刻

存

今在西安府學碑林石墨鐫華云此帖明成化

間余肅敏公

名子俊字士英
四川青神人

刻於石者書故橫

肆以刻手不良遂使素師婉轉清逸之趣十失

其五所未亡者骨力耳視前二帖斯爲下矣雍

州金石記云前有正書僧懷素三字後有跋云

唐釋懷素以草書鳴乃觀千文果足以信今傳
後間或毫釐有差特一時鐵筆未工耳茲用摹
刻於石大明成化庚寅歲陝西右布政使余子
俊跋細玩跋語似前已刻石余子俊又重摹上
石跋語未詳言耳書法較之聖母帖亦覺微遜
湖南零陵綠天菴瑞石帖中亦刻此本後題
唐大曆元年六月口口懷素書書法勝於此刻
而筆法亦有不同之處疑素師所書千文不止
一本故筆法不同耳

趙郡李氏女墓石記

李藩撰李潛正書
貞元十七年十二月

存

全文見古誌石華續編

誌畧云女趙郡高邑人也小字孫孫年十六貞元十七年十一月廿二日遘疾終於長安永甯里之旅舍以十二月三日窆於萬年縣高平鄉西焦村之南原曾祖父諱畬皇國子司業贈太子賓客祖諱承皇正議大夫檢校工部尙書兼潭州刺史贈吏部尙書諡曰懿子厯淮西道淮南道黜陟使河中道山南東道湖南道節度觀察都防禦都團練等使父藩祕書省祕書郎

此石今藏渭南趙乾生詹事

元中

家咸甯縣志

云焦村在西安府城南屬金霽霽社

社在城南十五里焉

今觀是誌在唐時已名焦村其名甚古矣李畬字玉田新唐書宰相世系表言其官考功郎中循吏傳言其官國子司業而贈官之事表傳均未載李承李藩新唐書亦均有傳承傳所載官秩多與誌合惟謚法失載書誌之李滔爲藩之弟宰相世系表未載得此可補其闕焉 新唐書百官志國子監司業二人從四品下東宮官屬太子賓客四人正三品尙書省吏部尙書一人正三品又志云觀察安撫支度營田招討經

畧團練防禦觀察處置採訪處置等使皆節度使兼領天寶末又兼黜陟使

京兆府涇陽縣主簿王邾墓誌銘

嗣澤王涇撰并行書貞元十九年

全文見古誌石華續編

存

誌畧云公諱邾字文秀琅耶臨沂人也曾祖同俊駙馬都尉琅耶文烈公贈太子少保尙定安長公主祖繇駙馬都尉琅耶懿公贈太子太傅尙永穆長公主父訓累授光祿卿娶嗣紀王織誠之季女公自宏文館明經虢州宏農尉次任

揚州江陽主簿入調長安授公京兆府涇陽主簿以其年八月九日終於萬年縣興甯里永穆觀之北院享年五十七夫人則秘書監贈揚州大都督嗣澤王漙長女潤之姊也公任宏農日染疾不起權殯於縣界長子貞素泣血號天柴毀過禮終身之痛惟茲是憂遂策杖於宏農扶護棺櫬將及合祔公有子二人次曰貞鎰女一人猶未及笄出我家也後娶楊氏有子三人女二人楊氏與貞鎰尙家維揚道路遐遠報不及期以其年閏十月十七日卜擇於萬年縣漣川

鄉先塋之側也

此石今藏渭南趙乾生詹事

元中

家王同皎新

舊唐書均見忠義傳新唐書本傳較詳五王誅
張易之等同皎與其謀後爲武三思陷害睿宗
時復官賜諡惟新唐書本傳言同皎諡忠壯誌
云諡文烈而王繇之諡懿公新書本傳中亦未
載也訓娶嗣紀王織誠之女宰相世系表作鐵
誠王訓誌作鐵城此處作織誠三處互異殊不
可解邽父訓有誌在咸甯縣田家灣訓誌嗣澤
王德撰邽誌嗣澤王潤撰潤爲德之子蓋王氏

與宗室世締婚姻亦以忠臣之裔故也誌本無紀元以資治通鑑攷之唐德宗貞元十九年係閏十月故定爲貞元十九年云 新唐書百官

志駙馬都尉無定員與奉車都尉皆從五品下東宮官屬太子太傅一人從一品光祿寺卿一

人從三品宏文館學士掌詳正圖籍教授生徒

宏文館明經殆生徒之屬也

唐宏文館隸門下省

又百官

志云京縣主簿二人從八品上畿縣主簿一人

正九品上上縣主簿一人正九品下中縣主簿

一人中下縣主簿一人下縣主簿一人均從九

品上涇陽畿縣也澤王潤題銜稱恩王府司馬
按恩王名連代宗子見十一宗諸子傳定安公
主中宗女新唐書作安定舊唐書作定安與誌
合永穆公主元宗女見新唐書諸公主列傳中

楚金禪師碑

沙門飛錫撰吳通微行書
貞元二十一年七月

存

全文見金石萃編

今在西安府學碑林刻於顏魯公多寶塔碑陰

神兮尼姜氏墓誌銘

正書
元和二年二月

存

全文見古誌石華續編

誌畧云大唐元和元年三月十四日長安昭成

寺尼大德三乘行歸寂於義甯里之私第春秋七十九戒臘一十九伏惟神兮俗姓姜氏望本天水今則長安高陵人也故中散大夫贈太子左贊善大夫執珪之女適昭陵令贈通州刺史李昕之妻有二子長曰誼終杭州餘杭縣令幼曰調終温州安固縣尉有嗣孫五人定寅寓甯實以元和二年二月八日歸窆於城南高陽原禮也

此石今藏渭南趙乾生詹事

元中

家姜氏適昭

陵令李昕已有一子五孫葬法則從浮屠唐人

崇奉佛法風尚如此不足異也誌末云泌追承
遺則泣而爲銘所謂泌者卽撰文人名也 新
唐書百官志東官官屬左春坊左贊善大夫五
人正五品上宗正寺卿所屬諸陵臺令各一人
從五品上

監察御史苻載妻李氏墓誌銘

苻載撰并正書
元和七年八月

存

全文備錄

亡妻李氏墓誌銘

并敘

孤子苻載述并書

夫人姓李氏其流派出於天潢之一枝矣衛尉
卿昇之孫吏部尚書鬻之堂姪孫房州刺史暹

之女凡婦之柔嘉茂淑組紉應對之事夫人備有焉加以敬恭長上誘納卑孺情禮周洽六姻睦然風韻孤遠不嬰常態中饋酒食外彈雅琴詠古詩鄙人褊忝陰有輔助不幸天落春秋三十六以貞元十一年三月十二日疾卒於尋陽是年四月廿一日權窆於德化縣之北嶺元和七年八月十日載上天降禍薦丁疊罰扶護靈櫬歸於鳳翔因得啟發耐於皇先姑之側禮也嗚呼生展於敬養歿藏於舊鄉上不愧於三光下不畏於九泉可謂始終婦道無罪悔矣男曰

匡孺女曰上清子攀號不逮哀經茶蓼宏農楊
夫人育之於顧復訓之於教義幾乎成立莫知
所自庶足以慰幽魂焉銘曰 浮江派漢歸舊
鄉已方甲穴掩元堂千秋萬歲安未央

此石今藏渭南趙乾生詹事

元中

家誌云夫人

爲衛尉卿昇之孫吏部尙書屬之堂姪孫房州
刺史逞之女新唐書宗室世系表大鄭王房有
光祿卿昇武都郡公吏部尙書屬昇之子名邁
而無房州刺史逞之名得此可補其闕又宗室
列傳太祖八子鄭孝王亮生子神通神通生子

孝節孝節曾孫鬻少孤事母孝與兄弟暈相
友以工部尙書遷吏部屢爲太子少傅武都縣
伯卒贈益州大都督 通鑑憲宗紀元和元年

高崇文旣擒劉闢韋皋參佐房式韋虔度獨孤

密符載郝士美段文昌等

式等本爲韋皋參佐
韋皋薨劉闢知節度

事稱兵而反式
等爲所註誤耳

素服麻屨銜土請罪崇文皆釋

而禮之并表薦式等厚贖而遣之目段文昌曰

君必爲將相未敢奉薦載廬山人也

胡注云廬
山在江州

得陽未嘗置縣恐誤案誌云其妻卒於尋
陽載固嘗居潯陽故或傳爲廬山人也

柳宗

元賀趙江陵辟符載啟云伏聞以武都符載爲

記室

案燕本居壽陽此云武都蓋舉其郡望也

苻君之藝術志氣爲

時聞人才位未會盤桓固久中間因緣陷在危

邦

此卽指劉閭事

與時俯仰不廢其道而爲見忌嫉者

橫致口吻房給事以高節特立明之於朝王吏

部以清議自任辨之於外然猶小人浮議困在

交戟凡諸侯之欲得苻君者城聯壤接而惑於

沸騰環視相讓莫敢先舉及受署之日則皆開

口垂臂悵望悼悔譬之求珠於海而徑寸先得

則眾皆快然罷去知奇寶之有所歸也嗚呼巧

言難明下流多訕自非大君子出世之氣則何

望焉又新唐書藝文志苻載有集十四卷文苑
英華選有苻載所撰劔南西川幕府寫真贊五
福樓記收獲虎頌文筆清健爾雅可誦此誌文
亦雅潔而十二硯齋譚文與書勢皆非佳品又
云志中稱父曰鄙人殊失子述父行之體文之
乖悖如此余案誌文云夫人敬恭長上誘納卑
孺情禮周洽六姻睦然風韻孤遠不嬰常態中
饋酒食外彈雅琴詠古詩鄙人褊吝陰有輔助
云云鄙人二字蓋載之自謂乃對其妻而言非
指其父而言也其題銜稱孤子者誌所謂上天

降禍薦丁登罰扶護靈輓歸於鳳翔因得啟發
耐於皇先姑之側其時載方丁父憂扶輓來秦
與母合葬其妻亦得耐焉稱孤子者以丁父憂
故也惟爲妻作誌自稱孤子終覺未安耳

今人居憂

計書則稱孤子與人書札則稱棘人以示區別
唐時無棘人之稱凡居憂者無往不稱孤子也
劉禹錫祭柳子厚文自稱孤子并云嗟余不天
甫遭閔凶禹錫之文蓋居憂時作故自稱孤子
也論此誌者每以孤子二字不得其解而文體

疏落入古味淡聲希以致每多訾議余爲博采
羣書詳加攷證庶使名流文字不致湮沒不彰
也新唐書百官志衛尉卿一人從三品

尊勝碑打本

正書

元和八年八月女弟子那羅延建

存

全文未見

雍州金石記云在西安府儒學

宣州司功參軍魏邈墓誌銘

子一匡贊撰并行書
元和十年乙未四月

存

全文見古誌石華誌云葬於京兆府萬年縣之

畢原

今在西安府學碑林書法似懷仁聖教序

朝散大夫祕書省著作郎韋端元堂誌

子紆撰并正書
元和十

存

五年五月

全文備錄

唐故朝散大夫祕書省著作郎致仕京兆韋公
元堂誌 第四子前山南西道節度判官將
仕郎試大理司直兼殿中侍御史紆謹撰并
書

唐元和十四年三月廿三日 公棄背於長安
新昌里私第享壽八十有三嗣子縝洎系練紆
絢哀號於天毀未敢死乃稽先王卜兆之義以
明年五月一日奉遷 靈座祔於萬年縣洪
固鄉畢原 先太夫人王氏之塋焉縝等咸
以 公潛耀道德不求顯著他人論議未能盡

美益自志之 公諱端字正禮 五代祖孝寬

後周大司空鄆襄公 高祖津隋民部尙書

曾祖琬皇成州刺史贈禮部尙書 祖季弼太

僕寺主簿 烈考廉尙書庫部郎中自鄆襄公

以盛業洪伐延耀後嗣以至於 郎中茂纘其

德官壽不至士大夫到於今嗟稱之 公卽郎

中第二子也體苞元精天付全德孝友忠信莫

匪生知以古之賢達有保身遺民不降其志不

辱其身之道莫不動與心契歸於一揆故常以

曠達自適怡攝爲宗是以家人忘貧信不稱德

官率更寺主簿下邳縣主簿下邳陽翟二縣丞
凡五仕三爲色養二爲孤幼皆非公之志也
自是之後蕭然杜門淮夷削平之明年 皇帝
在宥天下方宏孝理詔百辟父母存有顯擢歿
有褒贈時纘爲工部郎中由是拜 公朝散大
夫祕書省著作郎致仕 先太夫人追贈臨汾
縣太君時謂 公之義方纘之顯揚斯爲至矣
太夫人曾祖諱子眞 皇襄州錄事參軍祖怡
河南尹東都畱守考毗昭應縣尉 太夫人生
令族德門稟柔明淵懿脩睦婦道裁成母訓輔

佐君子臨廿年所以致養 先姑無違尤慈幼
惠下無怨悔續等不孝祿養未及禍罰已鍾而
外族淪替靡所依倚是以霜露怵惕有加罔極
之痛焉以貞元六年奉安宅兆至是蓋嗣嗚呼
蒼天纈工部郎中系陽翟縣尉練鄉貢進士紆
兼殿中侍御史絢前太廟齋郎紆頑闇不類哀
敬不文泣血書石以寘泉隧

此石今在西安府學碑林文既雅潔書法腴潤
酷似虞永興體唐時佳刻也端世系出鄭公房
見宰相世系表表中所載世系官爵不如誌之

詳也端妻夫人王氏亦有墓誌

貞元六年二月

已見前

惟夫人誌云曾祖諱真行有唐汝州葉縣令

世系

表云真葉令少一行字焉

此誌云諱子真官襄州錄事參軍

夫人祖怡官河南尹東都畱守兩誌皆同世系

表云怡戶部侍郎夫人誌云父毗京兆府奉先

縣丞此誌云官昭應縣尉先後互異有如此者

又夫人系出中山誌云系出太原蓋舉其郡望

也誌云淮夷削平之明年皇帝在宥天下新

唐書憲宗紀元和十二年十月癸酉克蔡州十

一月丙戌吳元鴻伏誅淮夷削平之明年乃元

和十三年也又莊子在宥篇曰聞在宥天下不聞治天下也在之者恐天下之淫其性也宥之者恐天下之遷其德也天下不淫其性不遷其

德有治天下者哉

司馬彪注曰在察也宥寬也郭象注曰宥使自在則治也

說見文選李善注謝靈運九日從宋公戲馬臺集送孔令詩注中又歛浦方名虛輅注曰民有常性當在之宥之不聞以法制整齊之也又嵇康答難養生論曰聖

人不得已而臨天下以萬物爲心在宥羣生由身以道與天下同於自然穆然以無事爲業坦爾以天下爲公故君臣相忘於上蒸民家足於下云云案嵇康此論解在宥二字最確蓋以王

道言之卽大舜無爲而治恭己正南面是也以
老氏之說言之卽清淨無爲是也三代以後如
曹參之載其清淨民以甯一漢文帝之元默躬
行以移風俗皆與在宥之意合 新唐書百官

志大理寺司直六人從六品上太僕寺主簿二
人從七品上東宮官屬率更寺主簿一人正九
品下國子監主簿一人從七品下祕書省著作

局郎二人從五品上司封郎中所掌凡外命婦

五品母妻爲縣君

此誌稱臨汾縣太君蓋以其夫已沒追贈縣君故得稱太

亦猶太夫人之稱也

又志云開元元年改京兆河南府長

史復爲尹

永徽中改尹爲長史至是復改爲尹

十一年太原復置

尹及少尹以尹爲畱守少尹爲副畱守謂之三都畱守三都者京兆爲西都河南爲東都太原爲北都每府府尹各一人從三品少尹二人從四品下

石忠政墓誌

正書

長慶二年八月

存

全文見古誌石華續編

誌畧云府君曰忠政字不邪京兆府萬年縣人婚何氏元和二年四月逝葬城西小巖村府君壽年八十有二終於長慶二年七月十日以其

年八月二十二日亦葬於小巖村

此石今藏渭南趙乾生詹事

元中家

邢國公梁守謙功德銘

楊承和撰正書
長慶二年十二月

存

全文見金石萃編

今在西安府學碑林

洋王府長史吳達墓誌銘

寇同撰正書
大和四年十月

存

全文見古誌石華誌云祔葬於京兆府萬年縣

洪固鄉北韋村

此石本出長安嘉慶二十二年偃師段襄亭大

令

嘉慶

移至武功縣署後歸長安蔣氏今藏渭

南趙乾生詹事

元中

家洋王名忻憲宗子見新

唐書十一宗諸子傳中

幽州節度衙前兵馬使王公夫人李氏墓誌銘

劉礎撰并

正書

大和六年五月

存

全文見古誌石華續編

誌畧云夫人諱元素其先隴西人也年十九適王公有男二人長曰從約次曰從禮有女一人早歸於礎夫人以大和六年二月廿有九日終於道政里之私第享年六十六以其年五月八日歸葬於京兆府萬年縣龍首鄉咸義里鳳栖

原禮也

此石今藏渭南趙乾生詹事

元中

家題銜稱正

議大夫檢校右散騎常侍光祿卿上柱國賜紫

金魚袋劉昉撰并書攷新唐書百官志右散騎

常侍二人屬中書省

案左散騎常侍隸門下省注云正三品下是右散騎

常侍亦正三品下也惟唐時品級自正四品起始分上下爲三十等既云正三品何得有上下之分攷文獻通攷云貞觀二年制諸散騎常侍皆爲散官從三品其說與新唐書志異又錢竹汀先生廿二史攷異云散騎常侍本從三品廣德二年五月升爲正三品見舊唐書職官志及會要可以證新唐書百官志之謬

大理司直辛幼昌墓誌銘

姑射處士睦畚撰正書

存

全文見古誌石華續編

誌畧云公諱幼昌字宏運其先隴西人曾祖父
奉國開府儀同三司豐州刺史天德軍使兼御
史大夫口郡肅國公食邑三千戶贈工部尙書
烈祖榮朔方節度副使口口都知兵馬使兼御
史大夫平陽郡王食封一百五十戶父口持節
通州諸軍事通州刺史兼御史中丞公授大理
寺司直以大和六年十二月廿五日卒於平陽
郡之私館口口年廿有六允子師周仲兄幼直
等以明年三月廿七日口歸祔於京兆萬年縣

三趙村東原之大塋禮也

此石今藏渭南趙乾生簷事

元中

家三趙村今

名三兆社隸咸甯縣之東南鄉距西安府城十

五里撰文之人名畚案畚卽畚字列于殷湯篇

荷擔者三夫叩石墾壤箕畚運於渤海之尾釋

文云畚音本是當與畚字同意 新唐書百官

志文散階從一品曰開府儀同三司御史大夫

一人正三品中丞三人正四品下爵九等二曰

郡王食邑五千戶從一品幼昌之祖榮封郡王

而食邑一百五十戶蓋指實封而言也唐自安

史之亂諸道用兵府庫無蓄專以官爵賞功諸將出征皆給空名告身自開府特進列卿大將軍下至中郎郎將聽臨事注名其後又聽以信牒授人官爵有至異姓王者唐之告身卽今牒卽今實此誌所云王公諸爵殆此類也唐之信收之類新

唐書百官志節度使有副使一人又新唐書

地理志豐州所領中受降城西二百里大同川

有天德軍天寶十二載置乾元後徙置永濟柵

故大同城也

遼史地理志大同城在天德軍城西南三里隋時所築

元和

郡縣志云元和八年李吉甫請修天德舊城以

安軍鎮詔從之於是復移天德軍理所於舊城
焉西南渡河至豐州二百里洪亮吉府廳州縣
志云唐豐州城在今內蒙古鄂爾多斯右翼後
旗中受降城在今內蒙古烏喇特旗西天德軍
城及隋大同城卽唐志所謂故大同城也并在烏喇特旗西
北其中蓋隔一河云又唐時安北大都護府於
開元十二年徙治天德軍蓋防邊之要地矣至
誌內所云通州爲今四川綏定府達縣地非順
天江蘇所屬之南北兩通州也

同州司兵曹參軍杜行方墓誌銘

鄭澣撰杜述甫正書

大和七年上

一月

未詳所在

全文備錄

唐故同州司兵參軍上柱國京兆杜府君墓誌

銘

并序

姨弟尚書吏部侍郎鄭澣撰

嗚呼士君子表於代而列於薦紳靡間言由已
之仁義是以前而又繕性於和體道於仁遵坦衢
泳天爵獨秉貞厚與令名相終始雖位壽或舛
人且許之爲達矣公諱行方字友直京兆杜陵
人也曾祖諱元志杭州刺史王父諱參謨陝州
司倉贈禮部郎中烈考諱倫文學政事爲時龜

玉異時選部第書判明廷策賢良皆登甲科價
歷公論厯憲闈郎署而後出分符竹公卽澧州
府君之長子弱冠游國庠以經明擢第釋褐任
右司禦率府冑曹參軍久之從調換同州澄城
縣丞三改秩至左馮翊司兵掾以大和七年秋
七月十二日啟手足於上都昇平里之私第享
齡六十問於龜策得十一月甲寅吉乃卜窆於
萬年縣龍首原夫人滎陽鄭氏祔夫人試祕書
省校書郎稱之第二女操順淑朗先公十年而
歿有子五人碩顥顥頤其幼小字曰老老女子

子二人皆柴立致毀弔賓爲之反袂公平生於
分義最明四方名人洎中外族昆弟其或旅食
靈臺求選京師懽然授館改星霜無倦色閑探
百家之言賦詩什頌道麗奄□□□□人以命
不可說相唁澣知公之事烈詳熟雪涕識□□
而口之其銘曰□□□□□昭令圖陰隲難
詰兮或隆或汙精金不試兮良玉不沽清風可
挹兮白日西徂野雲屯兮壟草蕪永矣潛寐兮
國城東隅堂弟前同州夏陽縣尉述甫書
黃氏虎癡本驥曰唐書宰相世系表襄陽杜氏

有元志考功郎中杭州刺史其子參謨陝州司
倉參軍卽行方之曾祖及祖也參謨三子寅淪
嶠淪水部郎中澧州刺史卽行方之父誤倫爲
淪行方及其五子之名皆表所未及撰文之鄭
澹乃德宗時宰相餘慶之子大和七年十一月
爲癸丑朔葬以甲寅月之二日也

此石本出西安今未詳所在矣撰文之鄭澹爲
宰相餘慶子本名涵後避文宗諱改名澹新唐
書有傳藝文志云鄭澹有集三十卷其時頗著
文名此誌古雅簡潔有韓門風範韓昌黎文集

有送鄭十校理序校理卽澣也

韓序作鄭澣其時尙未改名也

文宗嘗命澣萃擷經史爲要錄愛其博而精宜其工文矣澣官至尙書右僕射謚曰宣與修憲宗實錄 新唐書百官志東宮官屬太子左右司率府胄曹參軍事一人從八品下上州司兵參軍一人從七品下地理志曰同州上輔也又趙銜稱姨弟尙書吏部侍郎鄭澣撰新唐書百官志唐六部尙書皆屬尙書省故題曰尙書吏部侍郎示有所統也唐尙書省長官尙書令一人正二品左右僕射各一人從二品其後以太

宗嘗爲尙書令臣下避不敢居其職由是僕射
爲尙書省長官

附尙書八座考

初學記僕射秦官

秦始皇本紀有僕射周青臣

古者重武故

官曹之長主領其屬而習於射事也漢因秦本

置一人至獻帝以執金吾榮劭爲尙書左僕射

分置左右蓋始於此謝靈運晉書曰古者重武

事貴射御取其捷御各僕各置一人

各置一人當謂左右

僕射尙書六人謂之八座案光武分尙書爲六曹

并一令一僕射謂之八座魏有五曹與二僕射

一令謂之八座自晉以下尙書皆爲六曹有謂唐時以左右僕射與六曹尙書爲八座者蓋唐時以太宗嘗爲尙書令諸臣避不敢居故以僕射爲長官左右僕射各一人六曹尙書各一人合計之共得八人故以二僕射六尙書爲八座此說是也或謂侍郎爲八座者非也唐制吏部侍郎二人正四品上戶部侍郎二人禮部侍郎一人兵部侍郎二人刑部侍郎一人工部侍郎一人均正四品下六部侍郎共九人合之二僕射六尙書共十七人安得謂之八座乎況尙書

僕射從二品侍郎正四品上官階懸殊顏魯公
爭坐位帖所謂隔品是也似不得與僕射同稱
八座若六尚書秩皆正三品與從二品僅隔一
階似可比肩矣

誌云卜窆於萬年縣龍首原案周禮地官卜葬
兆甫窆注始爲穴也鄭大夫讀爲穿去聲杜子
春讀爲霏

太府寺主簿楊迥墓誌銘

賈文度撰楊迥正書
大和八年歲次甲寅八月

存

全文見古誌石華續編

誌畧云公諱迴字居然其先宏農人也曾大父元珪任銀青光祿大夫守工部尙書贈太子少保大父錡任銀青光祿大夫守衛尉卿駙馬都尉尙萬春公主贈太常卿父暵任中散大夫守光祿卿尙宜口縣主世秉懿德姻襲金枝初任文敬太子廟令次任左監門衛胄曹參軍次任左威衛胄曹參軍次任河中府河東縣尉次任太府寺主簿府君有子二人長子曰宏次子曰口訓以義方時人稱公善誘教何期口不福善以大和七年十月十七日寢疾終於延康里之

私第享口五十有二夫人秀容縣主十一月十日不勝其哀薨於靈側春秋二十有六後公廿三日而歿以歲次甲寅八月己卯朔廿四日子寅遷公及夫人靈座合安厝於萬年縣高平鄉高望里附先塋之禮也

此石今藏渭南趙乾生詹事

元中

家元珪等官

爵均詳新唐書宰相世系表惟表言錡官太僕卿誌作衛尉卿自當從誌爲正暉之官爵表中未載得此可補其缺迴之夫人秀容縣主自迴卒後不勝其哀薨於靈側可謂烈婦矣惟修史

之例自公主而外均不列傳賴此石流傳夫人
義烈得以復顯於世誌石下方爲土花所蝕文
多缺畧獨夫人殉夫事字畫完好豈鬼神亦有
闡幽之心而爲之呵護耶誌言迴葬於高平鄉
高望里案高望里當由高望堆得名潘岳西征
賦憑高望之陽隈文選注引長安圖云高望堆
延興門南八里今其地在西安府城南屬咸甯
縣境萬春公主元宗女見新唐書諸公主傳
新唐書百官志太府寺主簿二人從七品上文
散階正五品上曰中散大夫工部尙書一人正

三品太常寺卿一人正三品宗正寺卿所屬諸
太子廟令各一人從八品上十六衛左右監門
衛胄曹兼掌騎曹左右威衛胄曹參軍事一人
均正八品下文敬太子名諶德宗子見新唐書
十一宗諸子傳中

贈吏部尚書馮宿碑

王起撰柳公權正書
開成二年五月

存

全文見金石萃編

今在西安府學碑林案韓昌黎文集有答馮宿

書孫樵

字可之

與王霖秀才書以馮常侍

注云名宿字拱

之清河壁記與韓昌黎進學解同稱宿在當時

亦大著文名者今清河壁記已不傳文苑英華中載有蘭溪縣靈隱寺東亭壁記係宿所撰有燕許風格焉雍州金石記云馮宿唐史無傳案新舊唐書馮宿與其弟定審皆有傳史云宿爲婺州東陽人碑云冀州長樂人蓋史言著籍碑述郡望也此碑結構蒼秀局度方嚴尤爲柳書經意之作 五代史馮道自稱長樂老不知者謂其歷事五朝無往不樂其說頗誤其自稱長樂老蓋仍用馮氏郡望也

石刻十二經

艾居晦等正書
開成二年九月

存

今在西安府學碑林

周易二萬四千四百三十七字

九石

尚書二萬七千一百三十四字

十石

毛詩四萬八百四十八字

十六石

周禮四萬九千五百一十六字

十七石

儀禮五萬七千一百一十一字

二十一石

禮記九萬八千九百九十四字

三十三石

春秋左氏傳一十九萬八千九百四十五字

十六石

七石

公羊傳四萬四千七百四十八字

十七石

穀梁傳四萬二千八十九字 十六石

孝經二千〇百〇十三字 一石

論語一萬六千五百九字 七石

爾雅一萬七百九十一字 五石

五經文字三卷 張參撰 凡一百六十部三千二

百三十五字

九經字樣一卷 唐元度撰 凡七十六部四百二

十一字 合五經文字十石

九經并孝經論語爾雅五經文字九經字樣等
都計六十五萬二千五百五十二字凡字數標題均

係八分書綴於諸經之末咸甯縣志云共二百二十八石石刻二面凡一百十四碑

石經末有年月一行云開成二年丁巳歲月次於元日惟丁亥云云案爾雅釋天月名九月爲元是石經成於開成二年九月請書以爲十月誤矣書石者爲艾居晦陳玠前文學明經□□□段絳校勘兼看書上石者柏曷陳莊士覆定字體官唐元度校勘官兼專知都勘定經書檢校刊勒上石章師道楊敬之都檢校官同中書門下平章事鄭覃

咸甯縣志云開成石經唐時在務本坊國子監

天祐中韓建築新城石經委棄於野朱梁時劉

鄴守長安幕吏尹玉羽請輦入城即唐尚書省

之西隅地窪下霖潦衝注隨立輒仆宋元祐二

年龍圖閣學士呂大中徙置於府學北牖見元祐五

年黎持新移石經記又建隆三年劉從又脩

文宣王廟記云天祐甲子歲太尉許國公移太

學并石經於此許國公即韓建說與黎持記

不合韓建所移石經當指石臺孝經而言明

嘉靖乙卯地震石經倒損生員王堯惠等按舊
文集其缺字別刻小石立於碑旁見越嶺石
墨鐫華
案秦中裝潢石經其剪補缺字非專門名家不

能編次蓋其中皆有標記非熟悉部居者不能尋覓也余謂古本既缺卽宜照缺本裝冊缺字仍宜空之以示存疑之義且猶見廬山真面目也以後人所補之字羸入古刻中必有譌舛且古今文字不同之處極多安知今人所補之字不與古異乎新舊混淆轉足以滋疑竇不如獨裝古本之爲妙也

皇朝康熙二十年巡撫賈漢復補刻孟子七卷十七石生員許肇業等集唐石經字摹勒乾隆三十

七年巡撫畢沅編次并在碑林

余案唐時孟子書不列學官故

石經未刻
詳考見下

案孟子著書七篇二百六十一章三萬四千六

百八十五字漢孝文帝時與論語孝經爾雅并

置博士後罷傳記博士獨置五經而已見趙岐孟子題

辭案史言漢文帝崇尚黃老而論語孟子二書博士則文帝所置也文帝蓋儒道并用非專

尚黃老故文武成康以後論至東漢而趙岐乃

為之注共十四卷後漢書本傳岐本名嘉字臺

陵東漢時又有劉熙注孟子七卷鄭元注孟子

七卷均見隋書經籍志後漢書鄭元傳元字康成北海高密人梁有棊母窵

注孟子九卷見隋書經籍志一顧野王孟子釋

云憲為晉時人

長洲余仲林蕙客古經解 唐有陸善經注孟子

鈞沈序目云孟子疏引

七卷

見新唐書 張鑑孟子音義三卷

見新唐書 藝文志新

唐書列傳鑑字季權

一字公度蘇州人 丁公著孟子音

見孫奭孟 子音義序

案公著孟子音新唐書藝文志未載宋史藝文 志載有丁公著孟子手音一卷未知卽一書否

新唐書列傳公著 字平子蘇州吳人 至北宋孫奭乃據趙注兼采

諸儒之說撰孟子音義二卷

宋史儒林傳云奭 字宗古博州博平

人後徙 須城

自漢至北宋孟古注惟趙氏孫氏兩

家尙存全帙而陸張丁三家之說頗賴孫氏音

義以存其餘諸家之說卷帙久失間有零篇隻

字散見古書注中如李善文選注引劉熙孟子

注之類不過吉光片羽而已蓋唐初孟子不列

學官陸德明

名元朗以字行蘇州吳人

撰音義時有老莊而

無孟子寶應二年楊綰疏言請以論語孝經孟

子爲一經其後亦未舉行

事見新唐書選舉志

至唐末皮

日休

字襲美

請孟子爲學科上書云孟子之書燦

若經傳天惜其道不燼於秦自漢氏得之嘗置

博士以專其學故其文繼乎六藝光乎百氏真

聖人之微旨也今有司除茂才明經外有熟莊

周列子書者亦登於科

唐時習老莊文列者謂之道舉楊綰請罷之不

果其誘善也雖深而懸科也未正夫莊列之文

荒唐之文也有能汲汲以救時補教爲治哉伏
請命有司去莊列之書以孟子爲主有能精通
其義者其科選視明經苟若是也不謝漢之博
士矣疏上不報文獻通考選舉志云日休此疏上於懿宗咸通四年不報故
至北宋孫奭始撰音義其時古書半已消亡宜
其抱殘守缺存什一於千百也今十三經注疏
中通行孟子正義託名孫奭者乃邵武士人僞
作諸儒均弗善也

國朝乾隆壬辰休甯戴東原氏

震

取古本孟子趙注

參互考訂於是注文章旨題辭篇序均還舊觀

趙氏之書始有全本

此本闕里孔氏繼函刻之
徵波附叢書中附刻孫氏

音義

吾鄉甘泉焦里堂氏

循

復本趙注撰孟子正

義三十卷援證詳博於是孟子一書注疏之學始備

雍州金石記云西安府學之東偏中建大亭置唐元宗所書孝經今謂之石經臺備極雄偉其北構屋數十間東西廊各數間置石經於其中又於孝經臺北石經前架屋數十間置種種舊碑如聖教序之類爲石墨淵藪謂之碑林俗呼碑洞云

鳳枝案韓昌黎文集河東少尹李素墓誌云素父燮母夫人敦煌張氏其舅參有大名昌黎所云張參卽撰五經文字之張參也王維有送張參明經舉兼向涇州省觀詩亦卽其人也

馬曰璐小玲瓏山館所刻五經文字頗有舛誤卽如頰覘二字說文形聲絕不相通張參石本辨之甚明白馬氏重付剞劂偶因偏傍分晰未清遂使兩字混淆今爲詳考如左

說文頁部頰低頭也从頁逃省太史卜書頰仰

字如此揚雄曰人面頰

臣鉉等曰頰者逃亡之貌故从逃省今俗作俯

非是方矩切又云頰或从人免作俛石本五經文字

云頰方武反低頭也音俯與俛同或爲覲字非

案張參之說頰覲二字不相通也益明矣又說文見部覲諸侯三年

大相聘曰覲覲視也从見兆聲他切石本五經

文字云覲石經作覲蓋張參謂石經變兆爲乖

并未云變見爲頁也而馬氏曰瑤木刻本誤云

頰石經作頰非特變兆爲乖而又變見爲頁於

是世人遂謂頰有覲音矣半字之譌貽誤如此

世人有呼趙孟頰爲孟頰者不知始於何時案孟頰字子昂乃取頰仰之義若作頰音則當字

聘三方與覲字義合由此覲之非得石本證之趙孟頰之頰斷無讀覲音之理

其龔謬伊於胡底也石刻之有功於斯文豈淺鮮哉

進石經狀殘字

正書

存

全文備錄

第一行 鑄刻已畢伏以

第二行 備刊貞石遂使究尋不

第三行 儒風大闡自漢魏以後論

第四行 忝司成詳觀不朽之功實賀無疆

第五行 守國子毛詩博士上柱國章師道隨

第六行 事太清宮使監修國史上柱國滎陽郡

小字

開國公食邑二千戶臣覃狀進

黃氏虎癡

本驥

曰案石刻十二經已見關中金

石記末有年月一行艾居晦陳玠等十人銜名
十行詳載西安府志二書皆未及進書之狀此

石殘缺當爲明嘉靖乙卯地震所碎縱橫祇餘

尺許無年月是經成於開成二年十月

當作九月爾雅

釋天月名九月爲元

則進狀當在其時狀有忝司成三字

蓋鄭覃時爲國子祭酒

新唐書鄭覃傳云覃既名儒故以宰相領祭酒

即指其事狀卽覃撰而章師道等因隨狀署名也

鳳枝案此石未經前人著錄黃虎癡先生撰隋

唐石刻拾遺時始訪得此石表而出之其有功於關中金石非淺鮮矣 新唐書百官志國子監祭酒一人從三品五經博士各二人正五品上掌以其經之學教國子周易尙書毛詩左氏春秋禮記爲五經章師道題銜爲毛詩博士卽五經博士矣 鄭覃傳覃領祭酒時請太學五經經置博士祿廩比王府官

司直廳石幢

鄭模撰裴諸正書無年月祇庚申二字

當是開成五年續有會昌元年評事李口述一通

逸

全文未見

寰宇訪碑錄云在長安關中金石記咸甯縣志

均云在西安府學按此石今久逸矣司直爲大理寺屬官新唐書百官志大理寺司直六人從六品上評事八人從八品下此幢題名有評事之銜固知其爲大理司直矣司直廳者司直之

聽事也古官衙謂之聽事今則加广作廳與府州縣并列所謂府廳州縣也說文高小堂也从

高省同聲

去聲切

又頌篆下云高或从广頌聲金

壇段茂堂氏

玉裁

云元次山唐廡銘宋人多謂

廡卽亭字非也今案可讀如今之廳然則今之廳字卽古之高廡二字矣案高廡二字皆讀从

聲蓋廳字本由聽字轉出又與高廡同義故古
音皆讀仄聲也其讀平聲則自廣韻始廣韻云
廳廳屋也

他丁切

集韻云古者治官處謂之聽事

後語省直曰聽故加广增韻聽事言受事察訟
於是漢晉皆作聽六朝以來乃始加广

大達法師玄祕塔碑

裴休撰柳公權正書
會昌元年十二月

存

全文見金石萃編

今在西安府學碑林俗呼爲大柳有重摹本

案柳書全出虞永興但變虛和爲剛健惟古人
善學亦惟古人善變也詩文之道亦然

趙某妻張氏墓誌銘

沈楷撰安子正書
會昌三年五月

存

全文見古誌石華誌云窆於京兆府長安縣小

巖村

今在西安府學碑林

魏邈妻趙氏墓誌銘

王儔撰正書
會昌五年十一月

存

全文見古誌石華誌云祔於萬年縣鴻固鄉北

章村北原

黃氏虎癡

本驥

曰此誌與魏邈墓誌敘次多有

不同一家之事二石互異考據家欲據眾手共
成之史辨論千古得失不亦難矣哉

今在西安府學碑林

陀羅尼經幢并記

王鉉撰記尙口正書
大中二年正月于惟則建

存

幢記見金石萃編

今在西安府學碑林一名于惟則經幢帖賈謂
爲顏魯公書則誤矣

太子舍人翟府君夫人高氏墓誌銘

堂叔口口撰正書
大中四年

十月

存

全文見古誌石華續編

誌畧云夫人諱婉字順美我先祖渤海裔人也
曾祖利皇太中大夫太子僕贈揚州大都督祖

昇皇開府儀同三司鳳翔隴右節度觀察處置
使鳳翔尹兼御史大夫上柱國紀國公集賢待
制父饒皇儒林郎行鳳翔府參軍夫人則紀公
次子都官之第二女也生秉敏慧幼聞詩禮迨
有行於翟氏能輔佐以肥家大中三年十一月
十一日歿於京兆府鄠縣宜善鄉龐保村莊舍
春秋五十有八嗣子曰虔次日駢以四年冬十
月五日營窆於當鄉中龐村附於先舅先姑塋
之北阡孝之終也

此石今藏渭南趙乾生詹事

元中

家誌中夫人

姓缺郡望則爲渤海裔人案渤海裔縣本爲高
氏郡望而夫人之祖昇曾官鳳翔節度又有集
賢待制之銜考通鑑唐代宗廣德元年十月吐
蕃陷長安郭子儀收兵行至藍田遇鳳翔節度
使高昇又永泰元年三月命文武臣十三人於
集賢殿待制注中有檢校刑部尙書高昇此誌
云夫人之祖名昇官鳳翔節度使又爲集賢待
制與通鑑所書高昇官銜適相符合故定爲高
氏云 鄠縣新志東鄉有龐村南北二堡疑卽
此誌中之龐村也 方輿紀要云今直隸景州

治所本漢信都國所屬之脩縣師古曰脩音條
文帝時周亞夫封條侯卽此也後漢改屬渤海
郡晉及後魏因之隋開皇五年改曰菑縣屬冀
州唐屬德州永泰二年改屬冀州案改脩爲菑
見隋書地理志今以史冊及石刻考之隋以前
脩縣之脩不盡作脩也北魏書高聰傳作渤海
菑人高肇傳作渤海菑人見於石刻者北魏神
龜三年高植墓誌作渤海菑人東魏元象二年
高湛墓誌作渤海菑人惟正光二年高貞碑作
渤海脩人而魏收地形志勃海屬縣則仍作脩

蓋北魏以後別體字愈多一地名而書寫各異亦足見分疆割界不能混一同文也至隋而蕩平南北文軌大同於是改脩爲舊而一縣之名始有定字矣 新唐書百官志東宮官屬右春

坊太子舍人四人正六品上僕寺僕一人從四

品上大都督府都督一人從二品

地理志揚州大都督府也

鳳翔府尹一人從三品文散階正九品上曰儒

林郎唐時京兆爲西都洛陽爲東都太原爲北

都謂之三都鳳翔成都河中

今蒲州府

江陵

今荆州府

興

元

今漢中府

興德

今華州

謂之六府所屬有參軍事六

人正八品下惟六府則自錄事參軍以下皆減

一人

佛頂尊勝陀羅尼經幢

行書

大中四年元存勅建

存

此幢爲咸甯邑紳晁氏家藏今歸渭南趙乾生

詹事

元中

家

敕內庄宅使牒

正書

大中五年正月

存

比邱尼正言疏

正書

大中六年四月

存

全文見金石萃編

今在西安府學碑林刻於元祕塔之陰

華嚴寺杜順和尚行記

杜順撰董景仁行書
大中六年

存

全文見金石萃編

雍州金石記云此石在西安府城內東北隅開福寺佛殿前石墨鐫華金石文字記俱作開佛寺誤

魏公先廟碑

崔瑛撰柳公權正書
大中六年

存

全文見金石萃編

今在陝西布政司署內此碑寰宇訪碑錄云太中六年十一月立金石萃編及隋唐石刻拾遺列於咸通之末寶刻類編云相國魏謩先廟碑崔瑛撰柳公權正書并篆額大中六年立而無

十一月三字類編宋人所撰必有依據今從之
撰文者爲崔璵或作崔絢誤案崔璵爲頤子宰
相珙之弟新舊唐書崔珙傳云頤生八子皆有
才世以擬漢荀氏入龍宰相世系表云璵字朗
士河中節度使文獻通攷選舉攷唐制科名目
大和二年賢良方正直言極諫科崔璵及第此
碑文筆莊雅有韓門風範柳書亦遒勁絕倫所
紀係文貞家世亦可謂之三絕惜磨泐不全矣

劉某妻霍氏墓誌銘

周遇撰行書
大中十年正月

存

全文見古誌石華誌云祔葬於萬年縣龍首鄉

先常侍瑩西

此石今藏渭南趙乾生詹事

元中家

上都唐安寺尼廣惠塔銘

命狐專撰孔口口正書存
大中十二年六月

全文見金石萃編補遺

畧云大德諱廣惠俗姓韋氏漢丞相之遺祉周
司空之遠孫我皇十年以名臘隆抗充外臨壇
大德大中十二年夏五月廿六日寂然入滅報
齡五十七僧臘三十八弟子性通等以其年六
月十八日遷座於韋曲之右

此石今藏渭南趙乾生詹事

元中家末有隸書

一行云道光辛卯仲春余獲此石於城南韋曲

西北又有楷書一行云長安□□□□氏識

郎官題名石柱

正書

大中十二年十一月

存

題名姓氏及攷證均見金石萃編

今在西安府

文廟中

榮王府長史程修己墓誌銘

溫憲撰男進思正書
咸通四年四月

存

全文倘錄

唐故集賢直院官榮王府長史程公墓誌銘

并攷

鄉貢進士溫憲撰

男進思書

男再思

篆蓋

程氏之先出自伯休甫其後程嬰春秋時存趙孤以節義稱故奕世有令聞公諱修己字景立曾祖仁福左金吾衛將軍祖鳳婺州文學父儀蘇州醫博士公幼而□□通左氏春秋舉孝廉來京師遊公卿名人間能言齊梁故實而於六法特異稟天錫自顧陸以來夔絕獨出唯公一人而已大和中陳丞相言之於昭獻因授浮梁尉賜緋魚袋直集賢殿累遷至太子中舍凡七爲王府長史趙郡李宏慶有盛名常有鬪雞擊其對傷首異日公圖其勝者而其對因壞籠怒

出擊傷其畫李撫掌大駭昭獻常所幸犬名盧
兒一旦有弊蓋之歎上命公圖其形宮中政犬
見者皆俯伏上寵禮特厚畱於祕院凡九年問
民間事公拊口不對唯取內府法書名畫日夕
指撻利病上又命作竹障數十幅既成因自爲
詩命翰林學士陳夷行等和之盛傳於世公於
草隸亦精口章陵玉冊及懿安太后謚冊皆公
之書也丞相衛國公聞有客藏右軍書帖三幅
衛公購以千金因特以示公公曰此修己給彼
而爲非真也因以水濡紙挾起果有公之姓字

其爲桃杏百卉蜂蝶蟬雀造物者不能爭其妙
於其際仍備盡法則筆不妄下世人有得公片

迹者其緘寶耽翫千萬古昔公嘗云周侈傷其

峻周昉張□□其澹張太府萱盡之其唯韓乎又曰吳

怪逸元通陳象似幽悉楊若痿人強起庭光許若

市中鬻食琨性夷雅疎澹白晢美風姿趙郡李

遠見之以爲沈約謝朓之流大中初詞人李商

隱每從公遊以爲清言元味可雪緇垢憲嚴君

有盛名於世亦朝夕與公申莫逆之契高遊勝

引非公不得預其伍公又爲□□□□□畫毛

詩疏圖藏於內府以咸通四年二月一日遭疾
歿于昭國里第享年口十九先娶葉氏有子三
人長曰進思鄜州甘泉主簿次日退思品致尤
高妙與公迹殆相亂又其次曰再思於小學所
不通工篆籀其口狀澹古道健後娶石氏有女
二人長適滑州韋城縣尉景紹一女幼石氏亦
先公而亡以其年四月十七日葬於京兆府萬
年縣姜尹村憲嘗爲詠蛺蝶詩公稱其句因作
竹映杏花畫三蝶相從以寫其思其孤以憲辱
公之眚遂泣血請銘銘曰 五曜垂晶羣山降

靈鍾茲開氣瑞我昌庭遇物生象乘機肖形精
通膈蠻思入微冥願陸遺蹤曹張舊轍芳塵寂
寥妙迹蕪口故口空存神毫永輟千齡萬祀慘
淡夷滅

此石今在西安府學碑林誌云修己以善畫名
李商隱溫庭筠皆與之遊其名重一時可知矣
撰文之溫憲卽庭筠子也文體雅潔有韓柳風
格不愧飛卿之子全唐詩鈔小傳云憲庭筠子
登第後爲山南從事詩鈔內錄其春鳩郊居五
律二首詩致清麗能嗣其家風云進思楷法極

有晉人筆意於黃庭玉版爲近惟刻石筆畫太
細需得精拓本乃能精神畢露耳誌不言修己
爲何郡人篆蓋題云廣平程府君廣平程氏之
郡望也 誌云修己葬於京兆府萬年縣姜尹
村案咸甯縣東鄉韓森社有江尹村卽誌中所
謂姜尹村矣 誌題云集賢直院官新唐書百
官志元宗嘗於集賢院置畫直有官者爲直院
誌所謂直集賢院官卽其職也王府官屬長史
一人從四品上上州文學一人從八品下醫學
博士一人從九品下東宮官屬右春坊太子中

舍人二人正五品下 誌云修己爲榮王府長
史攷新唐書有兩榮王一爲靖恭太子琬元宗
子開元十三年由鄆王徙封一名憤憲宗子咸
通三年封案琬受封之時距修己之卒一百數
十年而誌云修己七爲王府長史卒官於榮王
府長史所謂榮王自以憲宗子憤爲是

黃氏虎癡

本號

曰修己爲畫苑名家而圖畫見

聞志圖繪寶鑑諸書皆闕而不載惟杜荀鶴松
窗雜記載開元中有程修己者善畫元宗問杜
丹詩誰爲首出對以中書舍人李正封詩曰國

色朝酣酒天香夜染衣上嗟賞移時誌載修己

卒於咸通四年上距開元末年凡一百二十

年杜記時代亦似未確鳳枝案全唐詩鈔李正

王涯文宗時相也是李正封小傳列於王涯之次

荀鶴松窗雜記開元之元本作成元宗之元本

作文傳寫之誤宜正之修己事迹見朱景元唐朝名畫錄

修己冀州人此誌未載其鄉貫案此誌篆蓋云

程氏之郡望此云冀州名畫錄云祖大厯中仕

越州醫博士父伯儀誌云祖鳳婺州文學父儀

蘇州醫博士所載互異以誌爲確名畫錄云周
昉任越州長史修己師事之凡二十年盡得其

妙應明經擢第誌僅載其舉孝廉來京師以待
詔畫院得官則非以科第進也名畫錄云大和
中文宗好古重道以晉明帝朝衛協畫毛詩圖
草木鳥獸古賢君臣之像不得其真遂召修已
圖之皆據經定名任意採掇由是冠冕之制生
植之姿遠無不詳幽無不顯又嘗畫竹幃於文
思殿文皇有歌云良工運精思巧極似有神臨
窗時乍覩繁陰一作臨窗忽覩繁陰合再明合再明真假殊未分當
時在朝學士等皆奉詔繼和二事與誌同不及
名畫錄之詳撰誌者爲詩人溫庭筠子憲誌云

大和中丞相謂陳夷行也然夷行之相在開成

三四年

案新唐書宰相表開成二年四月戊戌翰林學士工部侍郎陳夷行以本官同

中書門下平章事

非大和中也夷行及李商隱唐書皆

有傳李遠字求古大中建州刺史新書藝文志

有集一卷

案唐詩小傳云遠字求古蜀人第進士恩忠建江州刺史終御史中丞宋

趙德麟侯第錄云唐杭州刺史徐余李遠爲

守宣宗曰遠詩云青山不礙千杯酒白日惟消

一局某如此安能治民也案白曰亦作長日通

鑑唐紀宣宗大中十二年冬十月令狐綯提遠

杭州刺史上曰吾聞遠詩長日惟清一局某安

能理人約曰詩人託此爲高興耳未必實然上

日且令侍試觀之昭獻文宗廟號章陵文宗陵名懿安

太后憲宗后郭后也丞相衛公武宗時宰相李

德裕也修己所評諸畫家周昉張萱韓幹皆長
安人昉萱以人物勝幹以畫馬名吳道子善畫
鬼神楊庭光與道子齊名善寫仙佛像許琨開
元中以畫人物名皆見歷代名畫記誌中世字
凡三見皆不缺筆惟蝶葉二字仍改葉作柔是
誌磨泐過甚幾不可讀今細爲審識所缺者才
數字耳昔人云思誤書亦是一適錄畢爲暢然
者久之 案黃氏虎癡所撰隋唐石刻拾遺及
古誌石華二書均載此誌全文以石本校之尙
有舛誤之處訂正如左

第三行幼而口口本缺兩字拾遺作幼而穎敏
石華作英敏均非 第四行異稟天錫拾遺作

善陳天錫石華作姿稟天錫均非 第八行擊

其對傷首拾遺石華作爲其對傷首均非 第

九行李撫掌大駭拾遺作李爲之大駭石華作

李愕然大駭均非 第十二行因自爲詩拾遺

石華作因別爲詩均非 第十三行草隸亦精

精字下字已模糊拾遺衍一妙字非 第二十

二行昭國里第石華作京國里第非 第二十

三行品致尤高妙拾遺作畫法尤高妙石華作

詩歌尤高妙均非 第二十四行於小學所不通學字下漏刻一字本宜從缺拾遺作于學無所不通石華作于小學靡不通均非 第二十九行曹張舊敝石華作李張舊轍非

李郴夫人宇文氏墓誌銘

李郴撰楚封正書咸通八年丁亥八月

存

全文見古誌石華續編

誌畧云夫人姓宇文氏初代武川人太和中遷居洛陽遂爲河南人也高祖遠惑皇任梁王掾曾祖成器皇任絳州翼城縣丞贈禮部員外郎祖邈皇任御史中丞左遷澧州刺史贈太尉父

瓚現任右散騎常侍夫人工五七言詩詞皆雅
正常侍公每賢之咸通甲申歲因丞相今宛陵
楊公媒適隴西李郴時郴官京兆府參軍也明
年郴改長安尉其夏轉監察御史裏行充湖南
都團練判官又明年敕拜秘書郎又明年春夫
人得疾長安宣平里九十日啟手足而化是歲
丁亥夏四月辛卯享年叁拾有壹以其年八月
壬申歸葬長安縣承平鄉龍首原南劉村先塋
有子四人女二人長曰召前婺州義烏縣尉次
曰吉前宣州溧水縣尉次曰占授滁州永陽縣

主簿以親喪不之任幼曰同前明經云云

此石今在西安府學碑林宇文邈宇文瓚均見
新唐書宰相世系表遠惑及成器之名未載而
邈贈太尉瓚官右散騎常侍表中失載得此可
補其闕丞相宛陵楊公乃楊收也新唐書宰相
表咸通四年五月己巳翰林學士承旨兵部侍
郎楊收守本官同中書門下平章事七年十月
壬申收檢校工部尙書宣歙池觀察使收字藏
之新舊唐書皆有傳 柳子厚先君石表碑陰
先友記宇文邈河南人有文謹愨人也爲御史

中丞觀觀自守然以直免官後爲刺史卒卽此誌之宇文選矣 新唐書百官志禮部四司員外郎各一人從六品上京兆府參軍事六人正八品下監察御史正八品下龍朔元年置監察御史襄行後亦專以襄行名官至德後諸道使府參佐皆以御史爲之謂之外臺後有檢校襄行內供奉或兼或攝諸使下官亦如之又節度使所屬團練使有判官一人 梁王名忠高宗子始王陳後立爲皇太子顯慶元年廢爲梁王 見新唐書三宗諸子傳中

千手千眼觀世音咒

正書

咸通十二年正月後有此邱洪

雅及王元諗題名

存

經文不載

今在西安府城內臥龍寺

嶺南節度使右常侍楊發女子書墓誌銘

兄檢撰并正書

乾符五年十月

存

全文見古誌石華續編

誌畧云□□諱芸字子書隨越國公素之裔顯

考公常侍府君諱發第七女曾祖公諱藏器邠

州三水□□顯祖公諱遺直贈右僕射子書於

乾符五歲六月七日終於延福里第春秋卅十月廿八日葬於長安縣南原姜允村

此石今藏渭南趙乾生詹事

元中

家楊發字至

之爲楊收之兄附見收傳新唐書宰相世系表亦載藏器等名表云藏器爲三水縣丞則誌中三水二字下所缺者當係縣丞二字矣又表云遺直爲濠州錄事參軍其贈右僕射表中未載發之官爵表中亦未書發之子有名楨字文逸者而未載楊檢之名得此均可補其缺焉

南陵縣尉張師儒墓誌銘

蔡德章撰男溥正書

存

廣明元年十月

全文見古誌石華續編

誌畧云公名師儒其先清河人也曾祖景仁祖
昊父南素公自豸府從職授坊州昇平縣主簿
秩滿授宣州南陵縣尉乾符五年八月一日終
於宣州權居之所享年七十有二第三男溥護
喪歸京廣明元年十月五日乙酉吉辰歸葬於
萬年縣甯安鄉新塋之禮也夫人王氏引駕王
公魯之女有男四人長曰洙義武軍節度都押
衙銀青光祿大夫檢校國子祭酒前隴州長史
兼御史中丞次子曰汾豸府從宦次日溥次日

湜與義武節度王公弟左神策軍糧料使宏紹
旬當供軍之務有女一人媵同州押衙王袞兒
孫二人長名難胡長男洙之子次日周兒乃是
溥之子也孫女二人長適高翊次日阿宜云云
此石今藏渭南趙乾生詹事

元中

家誌中所云

義武軍節度乃王處存也與李克用同平黃巢
有功事見新唐書本傳方輿紀要云唐義武節
度治定州乾符六年王處存有其地 新唐書
百官志云十六衛左右金吾將軍所屬有引駕
仗三衛六十人引駕仗飛六十六人誌云張君

夫人之父王公魯曾爲引駕當卽此官焉

大悲心陀羅尼經幢

正書

乾甯元年後題女子陳氏建立

存

今在西安府城內臥龍寺方丈院中小楷字極精整唐幢之佳者

湘子廟經幢

正書

年月缺上題大唐京兆府長安縣孝悌九子

焦福昌造

存

今在西安府城內湘子廟街湘子廟內毛鳳枝訪得之

經幢

正書

無年月後題佛弟子惠敬名

存

今在西安府城內書院門街寶慶寺大殿後院
中石墨鐫華載劉慎徽所書石幢趙子頡以爲
佳品此幢徽字上慎字右邊眞字末筆尙可辨
識當係劉慎徽所書經幢也字迹頗爲道美寺
僧置之穢處余訪得此石因募人移於淨所拓
得數紙以歸又此幢之名亦見錢竹汀先生潛
研堂金石文字目錄中

尊勝陀羅尼經幢并記

經行書記正書

無年月存下截尺許中有中

龍大夫試太子左贊善五行末有六日建字

存

記見金石萃編補遺

今在西安府學碑林新唐書百官志東宮官屬

左春坊左贊善大夫五人正五品上

香城寺經幢

正書
無年月

存

今在西安府城內香城寺

西五臺經幢

無年月

存

今在西安府城內西五臺

西安府補遺

西魏

王智明造白玉石像記

正書
大統九年

未詳所在

全文見金石萃編補遺

向在西安府城內甜水井報恩寺中山陰萬賓

耀光遠訪得之今未詳所在矣

唐

荊州松資縣令湯君妻傷氏墓誌銘

正書

永徽二年正月

存

全文見古誌石華續編

誌畧云夫人姓傷氏諱大妃京兆鄠縣人也其先受氏於傷琳得姓於湯武父薄俱隋懷遠公成州刺史夫人卽刺史之長女也年纔二八卽適湯氏之門大唐永徽二年正月四日卒於禮

泉里第春秋八十有二以其年正月十五日葬於長安縣嚴村之左

此石今藏渭南趙乾生詹事

元中

家松資新唐

書地理志作松滋屬荊州江陵府此誌作松資當係筆誤元和姓纂及王伯厚

應麟

姓氏急就

篇均未見傷姓誌云受氏於傷琳未知其審

仁王院碑

韓擇木入分書

逸

全文未見

長安縣志云仁王院在省城

卽西安府城

九府街舊

志卽十方院有韓擇木入分書史惟則篆額

此石久逸存其名以俟訪

宇文琬墓誌銘

則珍撰曹惟良行書
天寶三載十月

存

全文見古誌石華續編

誌畧云公諱琬字琬代郡武川人也曾祖洪亮
皇靈州迴樂縣令祖楷皇綏州義合府左果毅
父延陵皇朝議大夫授絳州司馬垂裕積慶實
生我公洪惟執志謙默有質端偉慕君平而取
給欽仲長而不仕春秋六十一以天寶三載六
月五日終新昌里之私第其載十月二十日窆
於萬年縣龍首原禮也夫人天水趙氏子逃遂

等云云

鐵嶺李勤伯都護

慎

守西安時訪得此石字迹

適美完好無缺今移至關中書院新唐書地理志
綏州有府四第二曰義合百官志十六衛諸衛左右果毅都尉各一人上府從五品下中府正六品上下府正六品下

關中金石文字存逸攷卷二